



Innuttaasut atsiornernik katersinermikkut siunnersuutini Inatsisartuni suliarineqartussanik saqqummiussisarnissaat siunertaralugu Naalackersuisut aaqqissuussinermik pilersitseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Pipaluk Lyngge, Inuit Ataqtigiit)

(Siullermeerineq)

Inatsisartunut ilaasortap Pipaluk Lyngep siunnersuutaanut qjanaq.

Tamat oqartussaanerat ukiut sisamakkaarlugit qinersisarnermut tunngaannangilaq. Innuttaasut ataavartumik tusaaneqarsinnaanissaannut, eqqartugassanillu pingaarutilinnik politikikkut oqaluuserisassangortitsinissaminnut periarfissaqarnissaannut tunngavoq.

Tamanna pillugu innuttaasut siunnersuuteqarsinnaatillugit aaqqiissuteqarnissamik eqqarsaateqarneq Demokraatit pitsaasutut isigaat. Innuttaasut akuutinneqarnerinut nukittorsaataasinnaavoq, inuillu amerlanerusut politikikkut oqaluuserisassangortitsinissaannut toqqaannarnerusumik periarfissillugit.

Kisianni aaqqiinerup ersarissuunissaa, akisussaassuseqarnissaa, naleqquttumillu atorneqarsinnaanissaa pingaaruteqarpoq. Siunnersuut Inatsisartuni oqaluuserineqassaguni atsiornarit qassiussanersut isumaqatigiissutigissavarput. Systemi artukkertussanngorlugu kisitsit appasippallaassanngilaq, kisiannilu aamma innuttaasut periarfissaat takorluugaannanngorlugu qaffasippallaassanani.

Taassuma saniatigut innuttaasup siunnersuutaa qanoq misissorneqassanersoq, nutserneqassanersoq, nalilerneqassanersoq, Inatsisartunullu ingerlateqqinneqassanersoq ersarissunik malittarisassiortoqassaaq. Suut piumasaqaataanersut innuttaasut ilisimassavaat, Inatsisartullu systemeqassallutik siunnersuutiniq iluamik aqutsinnaasunik.

Innuttaasut siunnersuuteqarsinnaanerinut aaqqiissut pisariaqanngitsumik allaffissornermik kinguneqarani, tamat oqartussaanerinut nukittorsaataanissaa Demokraatinut aalajangiisuuvoq. Politikikkut sulianut innuttaasut qaninnerulersissavai, ilutigisaanillu Inatsisartuni sulineq suli pimoorussisumik, paasiuminartumillu tunngaveqarnissaa qulakkeerlugu.

Demokraatit inassutigaat, siunnersuut Inatsisartut Ataatsimiititaliami nangillugu oqaluuserineqassasoq.